

Bosna i Hercegovina
Federacija BiH
Kanton Sarajevo
Skupština Kantona Sarajevo
n/r g. Mirza Čelik, Predsjedavajući Skupštine
n/r g. Mario Nenadić, Premijer Vlade KS
n/r g. Ismir Jusko, Ministar unutrašnjih poslova KS

ZASTUPNIČKA INICIJATIVA

Pokrećem inicijativu prema vladi i resornom ministarstvu da se vrati novac građanima koji su platili kazne za nenošenje ili nepropisno nošenje maski na otvorenom prostoru, tj. na javnim mjestima.

OBRAZLOŽENJE: S obzirom na to da je Svjetska zdravstvena organizacija 6. aprila jasno napisala da "nema dokaza da maska sprječava širenje virusa i da se maske zbog nedostatka moraju rezervirati za zdravstvene radnike, da mogu kreirati lažni osjećaj sigurnosti, odvratiti pažnju ili umanjiti važnost držanja distance i pranja ruku" i da je SZO takođe insistirala na tome da maske nose oni koji su zaraženi, a pošto je testiranje u KS bilo skromnih razmjera, te stoga niko pouzdano ne može reći koji su građani bili zaraženi, a koji nisu, tj. koji su trebali nositi maske, a koji ne, smatram da su ove kazne bile pretjerane.

Kao drugi razlog navodim tzv. "ortački kapitalizam" i činjenicu da su neki koji su u bliskoj vezi sa političarima zaradili na prodaji tih maski Civilnoj zaštiti, ako ne na kantonalnom, a ono barem mnogo više na federalnom nivou. U tom kontekstu rigorozne kazne se takođe mogu činiti kao brutalna i organizovana pljačka građana od strane vlasti.

Te maske su se, ako su ih građani već tako skupo platili, morale civilima dijeliti besplatno od strane Civilne Zaštite, pogotovo ako zakon insistira na njima i naplaćuje po 500KM ako ih građani ne nose ili nepravilno nose, čak i na otvorenom. Pitam se, zar nije dovoljna "kazna" građanima bila ta što je što je ulaz u pekare i prodavnice bio zabranjen bez maske i rukavica tako da nisu mogli kupiti hranu ako ih nemaju, a, ako se sjećate, građani u početku nisu mogli kupiti maske jer ih nije bilo u apotekama jer ih nisu bile naručene na vrijeme. Tako da se naplaćivanje kazni pomalo čini kao oportunistički čin i pomalo neumjesan način da se napuni budžet.

Na stranu to što ne mislim da kazna od 500KM za one koji ne nose maske u zatvorenom prostoru, na proslavama rođendana, može i treba biti jednaka kaznama koje su naplaćene zbog nepravilnog nošenja ili nenošenja maske na otvorenom. Sam premijer Federacije BiH je viđen bez maske na otvorenom, pa mu ta kazna nije naplaćena. Zbog svega toga mi se nalazimo u situaciji da, nakon što je Federalni krizni štab je insistirao na obaveznim maskama na ulici i kaznama od 500km kojih se nije pridržavao ni sam premijer Federacije, mi danas u Kantonu Sarajevo ljudima koji su u međuvremenu ostali bez posla moramo sada davati novčanu pomoć koja je manja od kazne koju su platili.

Sarajevo, 18.05.2020. godine

SAMOSTALNI ZASTUPNIK

Damir Nikšić